

四庫全書

史部

欽定四庫全書

尚史卷九十三

志一

鑲白旗漢軍李鐸撰

天文志

易有太極是生兩儀兩儀未分其氣渾沌迨其既分則清陽為天濁陰為地是故天為元氣之始萬物之祖浮懸于上有宗動之樞左旋不已而王者法之亦建其極有所或戾則示變于上昭應于下董子曰天有喜怒之

氣哀樂之心與人相副以類合之天人一也是故堯命
羲和欽若昊天舜在璿璣玉衡以齊七政良以氣機消
息於赫不遠而躋敬合德顧諟維先乎顧天無質以氣
為質天無象以星為象古者包羲環規合矩因方出圓
用通其術迺諸家遂鑿空立數丈尺陰陽是猶約風而
挈其短長踵響而度其高下也不亦謬乎積微斯昭積
久斯著後來者密述天文志

古言天者有三家一曰蓋天二曰宣夜三曰渾天宣夜

之學絕無師法周髀術數具存考驗周髀者即蓋天之說也其言天似蓋笠地法覆槃天地各中高外下北極之下為天地之中其地最高而滂沱四隤三光隱映以為晝夜天中高于外衡冬至日之所在六萬里北極下地高于外衡下地亦六萬里外衡高于北極下地二萬里天地隆高相從日去地恒八萬里日麗天而平轉分冬夏之間日前行道為七衡六間每衡周徑里數各依算術用勾股重差推晷影極游以為遠近之數皆得于

表股者也故曰周髀又周髀家云天圓如張蓋地方如棋局天旁轉如推磨而左行日月右行隨天左轉故日月實東行而天牽之以西譬蟻行磨上磨疾蟻遲故隨磨以左迴焉天形南高而北下日出高故見日入下故不見天之居如倚蓋故極在人北是其證也極在天之中而今在人北所以知天形如倚蓋也日朝出陽中暮入陰中陰氣暗冥故暮不見夏陽氣多陰氣少陽氣光明與日同暉日出即見故日長冬陰氣多陽氣少陰氣

暗冥掩日之光雖出猶隱故日短宣夜之書云天了無
質仰而瞻之高遠無極眼矚精絕故蒼蒼然也譬旁望
遠道之黃山而皆青俯察千仞之深谷而窈黑青非真
色而黑非有體也日月衆星自然浮生虛空之中其行
其止皆須氣焉是以七曜或逝或往或順或逆伏見無
常進退不同由乎無所根繫故各異也故辰極常居其
所而北斗不與衆星西沒也攝提填星皆東行日行一
度月行十三度遲疾任情其無所繫著可知矣若綴附

天體不得爾也。渾天儀云：天如鷄子，地如鷄中黃，孤居于天內，天大而地小。天表裏有水，天地各乘氣而立，載水而行。周天三百六十五度四分度之一，又中分之則半覆地上，半繞地下。故二十八宿半見半隱，天轉如車轂之運也。黃帝書云：天在地外，水在天外，水浮天而載地者也。

晉志

虞喜安天論：天高窮于無窮，地深測于不測，天確乎在上，有常安之形；地隕焉在下，有居靜之體，當相冒。

方則俱方員則俱員無方員不同之義其光耀布列
各自運行猶江海之潮汐萬品之有行藏也虞聳穹
天論天形窮隆如雞子幕其際周接四海之表浮于
元氣之上譬如覆盞以抑水而不沒者氣充其中故
也日繞辰極沒西而還東不出入地中天之有極猶
蓋之有斗也天北下于地三十度極之傾在地卯酉
之北亦三十度人在卯酉之南十餘萬里故斗極之
下不為地中當對天地卯酉之位耳日行黃道繞極

極北去黃道百一十五度南去黃道六十七度二至之所舍以為長短也姚信昕天論人為靈蟲形最似天令人頭前多臨胷而項不能覆背近取諸身故知天之體南低入地北則偏高又冬至極低而天運近南故日去人遠而斗去人近北天氣至故冰寒也夏至極起而天運近北斗去人遠日去人近南天氣至故蒸熱也極之起時日行地中淺故夜短天去地高故晝長極之低時日行地中深故夜長天去地淺故

晝短也月令章句天有純陽積剛運轉無窮其體運
行色地之外左旋出地上而西入地下而東其繞北
極七十度常見不伏

天者何天之為言鎮也居高理下為人鎮也地者易也
言養萬物懷任交易變化也天道所以左旋地道右周
何以為天地動而不別行而不離猶君臣陰陽相對之
義也君舒臣疾卑者易勞天所以反常行何以為陽不
動無以行其教陰不靜無以成其化雖終日乾乾亦不

離其處也

白虎通

春為蒼天夏為昊天秋為旻天冬為上天

爾雅

呂氏春秋天有九野中央曰鈞天東方曰蒼天東北曰變天北方曰玄天西北曰幽天西方曰皓天西南曰朱天南方曰炎天東南曰陽天廣雅九天之際曰九垓九天之外曰九陔凡天去地二億一萬六千七百八十一里半度地之厚與天高等天南北相去二億三萬三千五十七里二十五步東西短減四步春

秋元命苞天不足西北陽極于九故天周九九八十
一萬里孝經援神契周天七衡六間者相去萬九千
八百三十三里合十一萬九千里從內衡至中衡中
衡至外衡各五萬九千五里 按讖緯雜說有以為
周天三百六十五度四分度之一一度千九百二十
二里天地相去十七萬八千五百里有以為一度二
千九百三十二里周天百七萬一千里說皆荒謬天
行可以數測體不可以數稽也

子午卯酉為二繩丑寅辰巳未申戌亥為四鉤東北為
報德之維西南為背陽之維東南為常羊之維西北為
號通之維日冬至則斗北中繩陰氣極陽氣蒙故曰冬
至為德日夏至則斗南中繩陽氣極陰氣蒙故曰夏至
為刑陰氣極則北至北極下至黃泉故曰德在室陽氣
極則南至南極上至朱天故曰德在野日冬至則水從
之曰夏至則火從之故五月火正而水漏十一月水正
而陰勝陽氣為火陰氣為水水勝故夏至濕火勝故冬

至燥八月二月陰陽氣均日夜分平故曰刑德合門德用則生刑用則殺故曰二月會而萬物生八月會而草

木死

淮南子

春秋繁露天道大數相反之物也不得俱出陰陽是也春出陽而入陰秋出陰而入陽夏右陽而左陰冬右陰而左陽陰出則陽入陽出則陰入陰右則陽左陽左則陽右是故春俱南秋俱北而不同道夏交于前冬交于後而不同理並行而不相亂澆滑而各持

分此之謂天之意天之道初薄大冬陰陽各從一方來而移于後陰由東方來西陽由西方來東至于中冬之月相遇北方合而為一謂之曰至別而相去陰適右陽適左適左者其道順適右者其道逆逆氣左上順氣右下故下煖而上寒以此見天之冬右陰而左陽上所右而下所左也冬月盡而陰陽俱南還陽南還出于寅陰南還出于戌此陰陽所始出地入地之見處也至于中春之月陽在正東陰在正西謂之

春分春分者陰陽相半也故晝夜均而寒暑平陰日損而隨陽陽日益而鴻故為燒熱初得大夏之月相遇南方合而為一謂之曰至別而相去陽適右陰適左適右由下適左由上上暑而下寒以此見天之夏右陽而左陰也上其所右下其所左夏月盡而陰陽俱北還陽北還而入于申陰北還而入于辰此陰陽所始出地入地之見處也至于中秋之月陽在正西陰在正東謂之秋分秋分者陰陽相半也故晝夜均

而寒暑平陽日損而隨陰陰日益而鴻故至于季秋而始霜至于孟冬而始大寒下雪而物成成大寒而物畢藏天地之功終矣

中宮天樞星其紐星天之樞也天運無窮而極星不移後句四星第一星主月太子也第二星主日帝也太乙之坐最赤明者也第三星主五星庶子也第四星后宮也中星不明主不用事右星不明太子憂

天官書其一明者太一常居後句四星末大星正妃

餘三星後宮之屬

環之匡衛十五星藩臣皆曰紫宮

右圖經左藩八星南第一星曰左樞次北上宰次北少宰次北上弼次北少弼次北上衛次北少衛最北少丞右藩七星南第一星曰右樞次北少尉次北上輔次北少輔次北上衛次北少衛最北上丞史記作十二星

四輔四星抱北極樞星主禮儀輔弼佐理六甲六星在

華蓋之下杠星之旁主分陰陽配節候出入鈞陳六星
在五帝座下為後宮星暗人主凶天皇大帝一星在鈞
陳中其神曰耀魄寶華蓋十六星在五帝座上正吉傾
邪凶杠九星為華蓋之柄星明匡主天下不明亂期八
年國無主五帝內座下覆帝座五帝同座也御女四星
在鈞陳北主八十一御女天柱五星近東垣主建二十
四氣女史一星在天柱下掌記禁中極東一星曰柱下
史主記過門內東南維五星曰尚書主納言陰德二星

在尚書西主周給賑財

史記前列直斗口三星隨北端兌若見若不曰陰德
大理二星在宮門內主刑獄門外六星曰天牀主寢舍
燕休西南角外三星曰內厨主六宮飲食相一星在斗
南總領百司明吉輔一星象近臣明大如斗則奪政近
斗為臣脅主內階六星在文昌北文昌六星在斗魁前
六星各有名一上將二次將三貴相四司命五司中六
司法文昌與三公攝提軒轅共為一體通占三公三星

在斗柄東和陰陽森七政天棓五星在女牀東北不用
明明兵起天槍三星在斗柄東主天鋒武備槍棓八星
備非常也傳舍九星在華蓋奚仲北主賓客之館客星
守之兵起天厨六星在宮東星芒客守之大饑天一
星在宮門外主戰鬪明吉暗凶乘斗後九十日兵大起
太一一星在天一南主十六神占如太一天牢六星在
斗魁下貴人牢占同貫索天理四星在斗杓中主貴人
牢勢四星在太陽守西北主刑獄太陽守一星主大臣

備不虞傳舍西八星曰八穀主八穀一星亡一穀不登
北斗七星所謂璇璣玉衡以齊七政杓擣龍角衡殿南
斗魁枕參首用昏建者杓杓自華以西南夜半建者衡
衡殿中州河濟之間平旦建者魁魁海岱以東北也斗
為帝車運于中央臨制四鄉分陰陽建四時均五行移
節度定諸紀皆繫于斗一天樞為土星主陽德二曰璇
主金刑陰三曰璣主木及禍四曰權主火為伐五曰衡
主水為煞六曰闔陽主木及五穀七曰瑶光主金亦為

應星王有德斗齊明國昌暗則災起

按五緯各有行次而金水二星則附日而行不得與
木火土三星比甘氏星經于北斗之下曰五星入斗
中國易政于文昌之下曰金星守兵大起是欲移黃
道以迫紫宮不自知其說之疎也

東宮蒼龍角南左角曰天津列宿之長北右角為天門
天官書左角李右角將元命包左角理物以起右角
將率而動

中為天關日月五星皆從天關行角南二度為陽道入陽道旱北二度為陰道入陰道水木星守有赦火星守忠臣誅兵起

天官書火犯守角則有戰

大環遶鉤已者國大饑土守內主喜國有忿爭金守兵大盛水守刑罰急有水災客彗孛入兵起大喪亦軍敗城陷客守四十五日旱蝗平道二星在角間主道路進賢一星在平道西明賢士用天門二星在左角南主天

門天田二星在角北主畿內地周鼎三星在大角西主
神鼎庫樓十星五柱十五星衡四星在角南一曰文陣
兵車之府中繁兵起中無星臣逆謀兵盡出柱半不具
天子自將木星守畿

天官書天庫樓庫有五車車星角若益衆及不具無
處車馬

南門二星在庫樓南天之外門平星二星在庫樓北平
法獄事亢為天府又為疏廟主疾疫明天下寧日月蝕

亢國中有事木星守有赦年豐久守水木火同守人死
如草木火守多雨兵起水守大水土守萬物不成金守
道不通彗孛犯之兵起大臣作亂攝提六星在亢東北
攝提者直斗杓所指以建時節故曰攝提格主九御為
甲兵火守更主大角一星為天棟在攝提中主帝座金
星守兵起月蝕王者惡之帝席三星在大角北不欲明
明則王公凶亢池六星在亢北折威七星在亢南主斬
殺陽門二星在庫樓東主隘塞頓頑二星在折威東主

治獄氏為天根主后妃主疫日月犯君惡之木星守后
喜火守大臣相譖久守有赦火星入之賊臣為亂期一
年遠二年金星守兵起水守大水水入貴臣憂土守立
太子久守兵起彗孛入氏後宮有異兵動梗河三星在
大角北主天子鋒又主邊兵為喪故變動應以兵喪招
搖一星在梗河北為天矛玄戈一星在招搖北為天盾
皆主兵芒角五星守邊兵起騎官二十七星在氏南主
天子騎虎賁星衆天下安星少五星守之兵起陣車三

星在氐南主兵車車騎將軍一星在騎官東南車騎三星在騎官南總領車騎天乳一星在氐北主甘露房為天府曰天駟房為四表日月五星常道也上一星右服二右驂三左服四左驂鉤鈐二星去房七寸主法日月蝕房中王者亂昏木星守天子有令德火守兵起土守有妾主及地動金守陪臣脇君大有土功若出房心中地動彗孛入房國危常以三月候房日月出表南大旱喪出表北兵陰雨罰三星在東咸西北東咸四星在房

東西咸四星在氐東主治淫佚巫官二星

晉志作從官

在房

西南主醫巫天輻二星在房西主乘輿鍵閉一星在房

東北

天官書作牽

主管禽星不欲明明則內亂門扉不禁心

三星為明堂中天王前太子後庶子名大火又曰大辰

中星明天子有德不欲直直天子憂木星守天下安火

守地動

天官書火犯房心王者惡之

土守聖帝出謀臣金守兵起蟲

災水犯有水客守犯赤地千里彗孛入主憂有喪積卒

十二星在氐東南大明動搖有兵一星亡兵半出二星

七兵大出三星亡兵盡出五星守兵起天市垣二十二星在房心北主權衡曰天旗

天官書東北曲十二星曰旗古圖經天市垣左右環曲各十一星左旗南第一星宋次南海次燕次東海次徐次吳越次齊次中山次九河次趙次魏右旗南第一星韓次楚次梁次巴次蜀次秦次周次鄭次晉次河間次河中二十二方主權衡聚衆亦謂之天旗庭主斬殺事史記謂十二星當是二十二星之誤

市中星衆則歲實五星入市門兵起帝座一星在市中
明潤天子威令行微小凶亡大惡之候在市東主陰陽
法官明強暗弱宦官四星在帝座西南宗正四星在帝
座東南主宗正宗人四星在宗正東主司享宗星二在
候東主宗室屠肆二星在帛度北市樓六星在市門中
主闌闌之司斗五星在宦官西南主稱量明則豐斗亡
仰不熟斛四星在斗南主斛食列肆二星在斛西北主
貨寶帛度二星在宗星東主平量車肆二星在市門左

星之西主市易天紀九星在貫索東主綱紀與貫索相連地動期二年不欲明明天下有怨恨亡則國政壞女牀三星在天紀北主後宮明則宮人恣七公七星在氏北為天相主三公七政星入河中人相食金守兵起貫索九星在七公前為賤人牢牢口一星為門門開有赦門閉及口星入牢中有自絞死者以五子夜候之一星亡有喜二星亡有爵事三星亡有赦星入河中人相食九星總見獄事煩

天官書句園五星屬杓曰賤人之牢牢中星實囚
多虛則開出

龍尾九星為九子主後宮一后次三夫人次九嬪次嬪
妾星欲明小大相承則宮多子孫木星守立太子三十
日后族逆兵火守兵相向火水合守箕尾間名九江口
有赦土守旱宮有廢黜土入兵起大將出征水守天下
水江河決客入饑人相食日月蝕尾貴臣刑神宮一星
在第三星傍解衣之內室傳說一星在第二星東二寸

明輔臣忠天江四星在尾北明動大水兵起不具天下
津梁不通天龜六里在尾南漢中火守旱澇災天魚一
星在河中明水火守南旱北水箕四星為教客主口舌
主二十七世婦八十一御女箕入河中大饑人相食木
守宮有口舌火守饑久守環遶鉤已大臣誅十月守之
大水土水守饑火守兵起金守兵起更主水守大人憂
客守大饑人相食糠一星明歲豐小微饑杵三星在箕
南星動人失釜甌

北宮玄武南斗六星為天關為廟主壽命大明王道和平帝命壽芒角動搖國失忠臣木守大臣增爵逆行入魁中大臣逆久守水大饑人相食火守有內變環遠鉤已將相死國災久守國絕嗣土守入斗中王者不用兵昇大位金守大臣作逆兵起火金俱入斗中曰鑠臣子逆水守水客守有兵弟子為逆或主崩斗中蝕者曰帝惡月后惡建六星在斗北天之都關

天官書建星者旗也

主司七

曜行得失木守水金守萬物不成水守饑天弁九星在

建北市宮之長暗凶狗二星在斗魁前移處卿臣為亂
狗國四星在建東南主鮮卑烏丸明邊兵起天雞二星
在狗國北主異鳥火守兵起土守人相食天鰲十五星
在斗南主水蟲不在漢中有水火災白衣食星大人喪
天泉十星在鰲東主溝渠天籥七星在斗杓第二星西
主關籥開閉農丈人一星在斗南主農官牽牛六星為
犧牲主關梁中主牛日月五星起于此星遠漢牛貴直
穀賈平曲米貴木守天下和平久守水人凍死臣謀主

火守老臣逆牛貴十倍人相食津梁不通土守臣謀主
金守兵起辰星常以冬朝牽牛不朝來年穀不熟大水
客守二十日兵起彗孛行牛中吳越有自王者彗出牛
中七十日更政河鼓三星中大星大將左左將右右將
直吉曲凶左右旗各九星在牛北枕河主軍鼓亡動兵
起織女三星在天市東為天女孫主菰果絲帛及女變
不向扶筐則絲帛貴火守布帛貴兵起十年乃息漸臺
四星屬織女東足主晷漏律呂輦道五星屬西足主遊

宮天樛四星在左旗南主漏刻九坎九星在牛南主溝
渠五星守犯水溢天田九星在牛東南主畿內田苗羅
堰二星在牛東暗吉須女四星為嬖女主布帛珍寶藏
明天下熟暗天下不足庫藏空虛日月蝕女中有憂木
星守多水女主有喜金守臣謀主兵起水守水彗守犯
兵起女亂常女下為十二諸侯曰越鄭趙齊周楚燕秦
魏韓晉代變動流亡五星凌犯則其國各當咎離珠五
星在女北主藏府移則亂歃爪五星在離珠北敗爪五

星在瓠瓜南不具搖動有賊害人天津九星在虛北河
中主津梁明動兵起星移河溢赤氣入旱黃白氣入天
子有令德火守天下亂扶筐七星在天柱東主蠶桑奚
仲四星在天津北主東宮虛二星主廟堂為哭泣之事
歌斜上下不比則嚮祀失禮木守昭穆失序人饑木土
合守曰陰陽盡大水魚行人道民流亡期三年大旱赤
地千里火守赤地千里有土功久守饑土守大旱多風
金守臣謀主政急兵起水守旱客守若凌犯環遶鉤已

國亂彗孛行犯流血如川司命司祿司危司非各二星
司命在虛北主喪送次司祿主官次司危主危亡次司
非主憊過哭二星在虛南泣二星在哭星東並主悲泣
天壘十三星在哭泣南主北夷匈奴敗白四星在危南
主政治如哭泣亡人賣釜甑出鄉宅離瑜三星在秦代
東主王候衣服危三星為蓋屋主宮室祭祀動而暗土
功興日月蝕危中宮殿崩大臣逆木星守祀不敬別造
宮室火守人多役死南方有兵久守東大兵饑土守土

功起旱金守罷兵將軍喜水守臣下亂謀水日月五星
入天下亂來年大饑彗孛犯兵起人五星在危北主百
姓亡官有詐偽婦人凶亂杵臼在人旁杵臼不相當軍
事饑白仰歲豐覆大饑車府七星在天津東主官車之
府造父五星在傳舍南主御女鉤九星在造父西星移
地動蓋屋二星在危南主宮室墳墓四星在危下主山
陵暗失本位山陵毀虛梁四星在危南主寢廟天錢十
星在虛梁南主錢庫營室二星為清廟主軍糧隱藏

元命苞營室十星埏陶精類始立紀剛包物為室爾
雅營室謂之定

明國昌動搖兵起日蝕室中王自將月蝕饑上六星曰
離宮主六宮鉤已環遶左右逆行妃后廢黜或主崩后
黨誅木星守南東有喜北憂西米貴火守將凶久守鉤
已主失官位臣陰謀旱經二十日至九十日臣弑篡土
守起土功金守兵革散久守兵滿野水守水彗孛出天
下亂國易政騰蛇二十三星在室北枕河主水蟲移南

旱移北水雷電六星在室西南雲雨四星在雷電東霹
靂五星在雲雨北主天威擊孽萬物土吏三星在室南
主農事壘壁十二星羽林軍四十五星並在室南主翊
衛明天下安暗兵盡失

天官書虛危南有衆星為羽林天軍軍西為壘或曰
鉞 按羽林軍南別有三星出敗白之間曰鉞史以
壘壁為鉞誤

北落師門一星在羽林軍西主侯兵明大而角軍安五

星犯兵起火金水尤甚木土犯吉火守國殘

天官書北落若微亡軍星動角益希及五星犯北落
入軍軍起 按舊說希當作布非是希當作軍言微
則亡軍動而角則益軍也

天綱二星在北落西主天繩八魁九星在北落東主獸
五星守兵起金火尤甚東壁二星主文章圖書曰天術
失色大小不同將封鄙土而失天下日蝕壁中國不用
賢失文字月蝕壁中文臣死木守仕人用火守臣謀君

旱兵起土守道術興天下熟火入中街君崩相薨土逆
行入壁經九十日大兵起百姓有立王者金守急刑罰
有兵大臣憂水客守水臣下賊王彗孛行犯兵起土公
二星在壁南主營造鉄鑛三星在八魁西北主斬刈亂
行移處兵起天廡十星在壁北主廡苑

西宮白虎

文耀鉤西宮白帝其精白虎天官書作西宮咸池咸池別是一星當作白虎是

奎十

六星曰封豕為溝瀆天之府庫西南大星曰天豕目明
吉奎不欲圓圓兵起五星犯奎權臣擅命蹇蹇有光近

臣謀上饑金星守邊陸之憂可以伐火守水憂連三年
土守中國利外不利王良五星在奎北居河中奉車御
官其四星為天駟旁一星曰王良動為策馬亦曰梁為
天橋客星守橋不通道前一星曰策主天子之僕移在
王良前或居馬後是謂王良策馬車騎滿野閣道六星
在王良前神所乘也天子遊別宮之道傳路一星在閣
道南婁三星為天獄主牧養犧牲以供郊祀動搖兵聚
金火守兵起天將軍十二星在婁北主武兵中大星天

大將也南一星曰軍南門主誰何出入天倉六星在婁
南南四星曰天庾積粟所也胃三星為天倉主倉廩五
穀之府明五穀豐稔天困十三星在胃南主給御糧天
廩四星在昴南主蓄黍稷共饗祀太陵八星在胃北亦
曰積京主大喪積京中星衆諸侯有喪民多疾兵起陵
中一星曰積尸明則死人如山北九星曰天船一曰舟
星所以濟不通也中一星曰積水候水灾昴七星為髦
頭金星也主西方主獄事明牢獄平六星明與大星等

大水七星皆黃兵大起一星亡為兵喪搖動大臣下獄
有白衣會大而動若跳躍邊兵大起天苑十六星在昴
南養獸之所胃南衆星曰膾積即芻藁六星主積藁草
不見牛馬暴死火守災起昴西一星曰天河主察山林
妖變卷舌六星在昴北主口語知佞讒曲吉直而動有
口舌之害中一星曰天讒主巫醫畢八星曰罕車為邊
兵主戈獵其大星曰天高罕八星之一
與後天高別四裔之尉明天
下安遠方入貢失色邊亂動兵起月宿則多雨其大星

旁小星為附耳搖動有讒亂臣在側明邊寇警入畢國起兵昂畢間二星為天街主國界其陰陰國陽陽國

孟康曰陰河山已北國陽河山已南國

土金守邊兵入參旗九星在參西天旗也王者斬伐當則旗曲直順理明而稀邊寇動畢附耳南八星曰天節主使臣天節下九星曰九州殊口曉方俗之官通重譯者九游九星在玉井西南兵旗也動搖則九州分散信命不通金火守之亂起五車五星三柱九星在畢東北

天子五兵車舍也西北大星曰天庫主太白秦也東北
曰天獄主辰燕趙也東曰天倉主歲衛魯也東南曰司
空主鎮楚也西南曰卿星主熒惑魏也五車均明柱皆
見則倉庫實不見其國絕食兵起三柱入出一月米貴
三倍期二年出三月貴十倍期一年火入旱金入兵水
入水其中五星曰天潢月五星入兵起天潢南三星曰
咸池魚圉也金犯守之兵起火守災五車南六星曰諸
王察諸侯存亡南一星曰天關亦曰天門日月之所行

主邊事關閉芒角有兵五星守貴人多死畢東四星曰
天高主望氣天苑南十三星曰天園植果菜之所觜觶
三小星隅置為虎首主葆旅事金木守國易主井鉞前
四星曰司怪主侯變異司怪北九星曰坐旗君臣設位
之表參為白虎三星直者是為衡石三將也東北曰左
肩主左將西北曰右肩主右將東南曰左足主後將軍
西南曰右足主偏將軍故黃帝占參應七將中三小星
曰伐都尉也主朝參曰參伐又曰大辰又曰天市主斬

列又主權衡又主邊城為九譯不欲明動七將皆明天
下兵精王道缺則芒角張伐星明與參等大臣謀兵起
參失色軍散敗動搖邊候急兵起左足入玉井中兵大
起秦大水若有喪玉井四星在參左足下主水漿東南
四星曰軍井行軍之井也西南二星曰屏天廁四星在
屏東下一星曰天矢矢黃吉青白黑凶

南宮朱鳥東井八星主水衡法令之所平也一大星黃
道之所經為天之亭候井明而端列王者用法平其西

曲星曰鉞主斬奢淫明與井齊或搖動天子用鉞于大
臣月宿井有風雨南河三星北河三星分夾井南北置
而為戒南戒一曰陽門亦為越門北戒一曰陰門亦為
燕門兩戒間七政之常道南星不見南道不通北亦如
之動搖及火守中國兵起闕邱二星在河南天子之雙
闕諸侯之兩觀金火守兵戰闕下

天官書兩河天闕間為闕梁

五諸侯五星在井北主刺舉又主帝心一曰帝師二曰

帝友三曰三公四曰博士五曰太史明大潤澤天下治
芒角禍在中五諸侯南三星曰天樽主給貧綏積水一
星在北河北供酒食之正積薪一星在積水東供庖厨
之正水位四星在積薪西主水衡客星若水火守犯之
百川溢井西南四星曰水府主水井南四星曰四瀆江
淮河濟之精也狼一星在井東南為野將主侵掠狼角
變色多盜賊下有九星曰旅天弓也主備盜賊常向狼
動移邊兵大起狼旅張害及內天下乖亂又曰天弓張

天下盡兵老人一星在弧南一曰南極常以秋分之旦見于丙春分之夕見于丁見則治平主壽昌軍市十三星在參東南天軍貿易之市野雞一星在軍市中主變怪軍市西南二星曰丈人丈人東二星曰子子東二星曰孫與鬼四星天目也主視明察姦謀東北星主積馬東南星主積兵西南星主積布帛西北星主積金玉隨變占之中一星為積尸一名質主死喪祠祀一曰鈇鎖主誅斬鬼明穀成不明百姓散質欲不明明兵起大臣

誅故德成衡觀成潢

衡太微廷潢
五帝車舍

傷成鉞禍成井誅成

質

索隱德成衡言有德公平者先成形于衡觀成潢言
王者遊觀先成形于潢傷成鉞言王者敗德先成形
于鉞禍成井井主水事火入天子且以火敗誅成質
熒惑入輿鬼天質大臣有誅

狼北七星曰天狗主守財脈南六星為天社鬼西北四
星曰耀烽火之耀也邊警候耀柳八星為鳥注

爾雅鳥喙謂之柳

主木草又為厨宰主尚食和滋味明吉金火守國兵大起軒轅右角南三星曰酒旗主饗宴五星守天下大醜柳南六星曰外厨厨南一星曰天記主禽獸之齒七星頸為員官主急事又為天都主衣裳文繡星明王道昌闇則賢良不處天下空金火守國兵大起軒轅東四星曰内平平罪之官酒旗南三星曰天相丞相之象也七星南五星曰稷農正也張六星張素為厨主觴客主珍

寶宗廟服用明王者行五禮得天之中金火守國兵大起張南十四星曰天廟天子之祖廟也客守祠官憂權衡衡太微三光之廷主理法平辭監升授德列宿受符諸神考節南藩中二星間曰端門東曰左執法西曰右執法所以舉刺凶姦左執法之東左掖門右執法之西右掖門東藩四星南第一上相其北東太陽門第二次相其北中華東門第三次將其北東太陰門第四次將所謂四輔也西藩四星南第一上將其北西太陽門第

二次將其北中華西門第三次相其北西太陰門第四
上相亦曰四輔也東西藩芒動搖諸侯謀執法移刑罰
急月五星順入軌道司其出所守天子所誅也

宋均云司察日月五星所守列宿若請官屬不去十
日者天子誅之

其逆入若不軌道以所犯命之中坐成形

謂犯帝坐也

皆羣

下從謀也金火尤甚黃帝坐在太微中舍樞紐之神四
帝星挾黃帝坐東方蒼帝靈威仰之神南方赤帝赤熛

怒之神西方白帝白招矩之神北方黑帝叶光紀之神
天子動得天度止得地意則五帝坐明坐北一星曰太
子太子北一星曰從官坐東北一星曰幸臣屏四星在
端門內所以壅蔽帝庭也郎位十五星在帝坐東北曰
依鳥郎府郎主守衛星不具后妃死幸臣誅明大及客
星入大臣為亂郎將在郎位北主武備虎賁一星在西
藩北下名南靜室旄頭之騎官常陳七星在帝坐北宿
衛以設疆禦搖動天子自出明武兵用微兵弱三台六

星兩兩而居起文昌列抵太微近文昌二星曰上台為
司命主壽次二星曰中台為司中主宗室東二星曰下
台為司祿主兵又曰三台為天階一曰泰階上階上星
為天子下星為女主中階上星為諸侯三公下星為卿
大夫下階上星為士下星為庶人君臣和集如其常度
有變則占中台之北一星曰太尊貴戚也左執法北一
星曰謁者東北三星曰三公三公北三星曰九卿九卿
西五星曰內五諸侯辟雍之禮得則太微諸侯明其西

南角外三星曰明堂布政之宮明堂西三星曰靈臺觀
臺也少微四星在太微西一名處士亦天子副主或曰
南第一星處士第二議士第三博士第四大夫明大而
黃則賢士舉月五星犯之處士女主憂南四星曰長垣
主界域熒惑入之邊境騷動太白入之九卿謀權軒轅
軒轅黃龍體十七星前大星女主也次北一星夫人也
次北一星妃也其次諸星皆次妃之屬女主南小星女
御也左一星少民后宗也右一星太民太后宗也色欲

黃小而明月五星守犯者如衡占

軒轅舊為七星之屬
今從權衡之說入太

微翼二十二星為羽翮主遠客又天之樂府明大禮樂

興四國賓星動外國使來離徙天子舉兵翼南五星曰
東區蠻夷也軫四星為車主風又主宰輔有軍出入占
于軫星動車駕用轄傳軫兩旁主王侯左轄同姓右轄
異姓明兵大起遠軫凶又曰車無轄國有憂就聚兵大
起長沙一星在軫中主壽命不欲明明與四星等若五
星入軫中兵大起

晉志長沙明主壽長子孫昌與史異

軫南三十二星曰器府樂器之府青邱七星在軫東南
實主外國青邱西四星曰土司空主界域司空北二星

曰軍門主營侯彪尾威旗

甘氏
星經

星經文缺不備今取天官書晉志雜成之列宿各有
所屬星還歸本屬而次天市垣于心尾之上太微垣
于張翼之間者明部分之所在也

尚史卷九十三

欽定四庫全書

尚史卷九十四

志二

鑲白旗漢軍李鋈撰

天文志

日有中道中道者黃道一曰光道光道北至東井去北極近南至牽牛去北極遠東至角西至婁去極中夏至至于東井北近極故晷短立八尺之表而晷景長尺五寸八分冬至至于牽牛遠極故晷長立八尺之表而晷

景長丈三尺一寸四分春秋分去極中而晷中立八尺之表而晷景長七尺三寸六分此日去極遠近之差晷景長短之制也去極遠近難知要以晷景晷景者所以知日之南北也日陽也陽用事則進而北晝進而長陽勝故為溫暑陰用事則日退而南晝退而短陰勝故為寒涼也若日之南北失節晷過而長為常寒退而短為常燠此寒燠之表也一曰晷長為潦短為旱奢為扶

鄭氏注扶當作蟠蟠止不行也一說奢景形奢大扶

附也

扶者邪臣進而正臣疏君子不足姦人有餘

漢志

周以土圭致日土圭者尺有五寸大司徒以土圭之灋
測土深正日景以求地中日南則景短多暑日北則景
長多寒日東則景夕多風日西則景朝多陰日至之景

尺有五寸謂之地中

周禮

康成注晝漏半而置土圭表陰陽審其南北景短于
土圭謂之日南地于日為近南也景長于土圭謂之

日北地于日為近北也東于土圭謂之日東地于日為近東也西于土圭謂之日西地于日為近西也凡日景于地千里而差一寸景尺有五寸者南戴日下萬五千里地與星辰四遊升降于三萬里之中是以半之得地之中也賈公彥疏周公度日景之時置五表于潁州陽城置一表為中表中表南千里置一表北千里置一表東千里置一表西千里置一表中表之南畫漏半立八尺之表表北景得尺四寸不滿尺

五寸不與土圭等是地于日為近南景短多暑中表
之北亦晝漏半表北得尺六寸景是地于日為近北
景長多寒中表之東亦于晝漏半中表景得正時東
表日已昃矣是地于日為近東晝漏半已得夕景故
云景夕多風中表之西亦于晝漏半中表景得正時
西表日未中仍得朝時之景故云景朝多陰南戴日
下萬五千里者景一寸差千里地中尺五寸景去南
戴日下萬五千里也地與星辰四遊升降者考靈耀

文言春分之時地與星辰復本位至夏至地與星辰
東南遊萬五千里下降亦然至秋分還復正至冬至
地與星辰西北遊亦萬五千里上升亦然至春分還
復正進退不過三萬里是以半之得地之中也

按日行之道曰黃道恒星之天曰天體黃道與恒星
之天相錯而推移焉是以當堯之時春分日在昴昏
星中夏至日在張昏心中秋分日在房昏虛中冬至
日在虛昏昴中而月令則春分日在奎昏弧中夏至

日在井昏亢中秋分日在角昏牛中冬至日在斗昏
壁中漢志則春分日在婁昏柳中夏至日在井昏氏
中秋分日在角昏牛中冬至日在牛昏奎中所以然
者歲差之謂也蓋天有三百六十五度四分之
一歲有三百六十五日四分之一天度四分之
一而
有餘歲日四分之一而不足故天漸差而西歲漸差
而東也古歷簡易未立差法漢洛下閎知以八百年
當差一度至晉虞喜立歲差以五十年退一度為太

過何承天倍其年又不及至隋劉焯取中數七十五年唐一行大衍歷定為八十三年宋紀元歷定為七十八年尤為最密故測日者止可倚晷景之短長以度去極之差不可膠恒星之度數以畫分至之限也然則漢志所謂黃道北至東井南至牽牛東至角西至婁者特一時之定程要非天體之妙微也

又按天之樞為南北兩極其北極由地上常見之天以至南極百八十度南極由地下常隱之天以至北

極亦百八十度分兩極而中畫之各九十度曰赤道
赤道者東西建標南北定緯術者所由立算而天實
無所謂赤道者也黃道則斜絡天腹半出赤道南半
出赤道北其南當午距赤道二十三度半強而止其
北當子距赤道亦如之而東西則與赤道交于卯酉
是故春分日當兩道之交則晝夜平寒暑均八尺之
表而晷景長七尺三寸六分過此則循黃道而漸出
赤道北至夏至造其極故晝長多暑八尺之表晷景

長尺五寸八分秋分又當兩道之交故晝夜又平寒暑又均八尺之表晷景長七尺三寸六分過此則循黃道而漸出赤道南至冬至造其極故晝短多寒八尺之表晷景長丈三尺一寸四分此晷景長短之所由四時寒暑之所以變也天運左旋無所遊移此體中立無所偏薄鄭氏雜取緯書以為夏至地與星辰東南遊萬五千里冬至地與星辰西北遊萬五千里地與星辰四遊升降于三萬里之中其說支離非周

土圭之舊灋乎

兩軍相當日暈暈等力鈞厚長大有勝薄短小無勝重
抱大破無抱為和背不和為分離相去直為自立立侯
王指暈若曰殺將負且戴有喜圍在中中勝在外外勝
青外赤中以和相去赤外青中以惡相去氣暈先至而
後去居軍勝先至先去前利後病後至後去前病後利
後至先去前後皆病居軍不勝見而去其發疾雖勝無
功見半日以上功大白虹屈短

李奇曰屈或為尾
韋昭曰短而直

上下

兌有者下大流血日暈制勝近期三十日遠期六十日
其食食所不利復生生所利而食益盡為主位以其直
及日所宿加以日時用命其國

天官書

月有九行黑道二出黃道北赤道二出黃道南白道二
出黃道西青道二出黃道東立春春分月東從青道立
秋秋分西從白道立冬冬至北從黑道立夏夏至南從
赤道然用之一決房中道

漢志

索隱中道房室星之中間也房有四星若人之房三

間有四表然故曰房南為陽間北為陰間中道房星
之中間也故房星是日月五星之常行道宋祁注朱
子文云房當作於是未知房為中道也

月行中道安寧和平陰間多水陰事外北三尺陰星北
三尺太陰大水兵陽間驕恣陽星多暴獄太陽大旱喪
也

索隱太陰太陽皆道也太陽亦在陽間之南各三尺
按注殊是義未明晰竊謂陰星下北三尺三字當

作南三尺在陽星上陽星下多暴獄三字當在驕恣
下言月行陰間則多水陰事陰間近北三尺為陰星
氣屬太陰其應主大水與兵陽間則驕恣多暴獄陽
間亦近南三尺為陽星氣屬太陽其應主大旱與喪也
角天門十月為四月十一月為五月十二月為六月水
發近三尺遠五尺

索隱謂月行入角與天門若十月犯之當為來年四
月成災十一月則主五月也

犯四輔輔臣誅

索隱四輔房四星也

行南北河以陰陽言旱水兵喪月蝕歲星

正義凡星入月見月中為星蝕月月掩星星滅為月蝕星

其宿地饑若亡熒惑也亂填星也下犯上太白也彊國以戰敗辰星也女亂食大角主命者惡之心則為內賊

亂也列星其宿地憂

天官書

凡君行急則日行疾君行緩則日行遲日行不可指而知也故以二至二分之星為候日東行星西轉日行疾則星西轉疾事執然也故過中則疾君行急之感也不及中則遲君行緩之象也至月行則以晦朔決之箕星為風東北之星也東北地事天位也

孟康曰東北陽日月五星起于牽牛故為天位坤在西南紐于陽為地統故為地事

巽在東南為風風陽中之陰大臣之象其星軫也月去

中道移而東北入箕若東南入軫則多風西方為雨雨
少陰之位也月失中道移而西入畢則多雨星傳曰月
入畢則將相有以家犯罪者言陰盛也月南入牽牛南
戒民間疾疫月北入太微出生北若犯坐則下人謀上
一曰月為風雨日為寒溫冬至日南極晷長南不極則
溫為害夏至日北極晷短北不極則寒為害政治變于
下日月運于上矣漢志月食始日五月者六六月者五五
月復六六月者一而五月者五凡百一十三月而復始

索隱始日謂蒼始起之日也依此文計惟有一百二
十一月與元數甚為懸校既無太初歷術不可得而
推定以漢志統歷法計則五月者七六月者一又五
月者一六月者五五月者一凡一百三十五月而復
始耳或術家各異或傳寫錯謬無以明也

天官
書

故月蝕常也月蝕為不減也日蝕國君月蝕將相當之

察日月之行以揆歲星順逆

晉灼云太歲在四仲歲行三宿在四孟四季歲行二宿二八十六三四十二而行二十八宿十二歲而周天曰東方木主春日甲乙義失者罰出歲星

漢志歲星東方春木于人五常仁也五事貌也仁虧貌失逆春令傷木氣罰見歲星

以其舍命國所在國不可伐可以伐人其趨舍而前曰贏退舍曰縮贏其國有兵不復縮其國有憂將亡國傾敗其所在五星皆從而聚于一舍其下之國可以義致

天下以攝提格歲歲陰左行在寅歲星右轉居丑正月
與斗牽牛晨出東方名曰監德

索隱星在斗牛失次應見于杓與甘氏及太初歷所
在之宿不同

色蒼蒼有光其失次有應見柳歲早水晚早歲星出東
行十二度百日而止反逆行逆行八度百日復東行歲
行三十度十六分度之七率日行十二分度之一十二
歲而周天出常東方以晨入于西方用昏單闕歲歲陰

在卯星居子以二月與婺女虛危晨出曰降入大有光

其失次有應見張歲大水執徐歲歲陰在辰星居亥以

三月與營室東壁晨出曰青章青青甚章其失次有應

見軫歲早早晚水大荒駱歲歲陰在巳星居戌以四月

與奎婁胃昂晨出曰躄踵

徐廣曰一路嶂

熊熊赤色有光其

失次有應見亢敦牂歲歲陰在午星居酉以五月與胃

昂畢晨出曰開明

徐廣曰一天津

炎炎有光偃兵唯利公王

不利治兵其失次有應見房歲早早晚水叶洽歲歲陰

在未星居申以六月與觜觶參晨出曰長列昭昭有光
利行兵其失次有應見箕涪灘歲歲陰在申星居未以
七月與東井與鬼晨出曰大音昭昭白其失次有應見
牽牛作鄂歲歲陰在酉星居午以八月與柳七星張晨
出曰為長王作作有芒國其昌熟穀其失次有應見危
有旱而昌有女喪民疾闕茂歲歲陰在戌星居巳以九
月與翼軫晨出曰天睢白色大明其失次有應見東壁
歲水女喪大淵獻歲歲陰在亥星居辰以十月與角亢

晨出曰大章

徐廣曰一曰大星

蒼蒼然星若躍而陰出旦是謂

正平起師旅其率必武其國有德將有四海其失次有
應見婁困敦歲歲陰在子星居卯以十一月與氐房心
晨出曰天泉玄色甚明江池其昌不利起兵其失次有
應在昴赤奮若歲歲陰在丑星居寅以十二月與尾箕
晨出曰天皓黓然黑色甚明其失次有應見參當居不
居居之又左右搖未當去去之與他星會其國凶

漢志所去失地所之得地一曰當居不居國亡所之

國昌已居之又東西去之國凶不可舉事用兵安靜
中度吉

所居久國有德厚其角動乍小乍大若色數變人主有
憂其失次舍以下進而東北

孟康曰五星東行天西轉歲星晨見東方行疾則不
見不見則變為祆星

三月生天棊長四尺未兌

漢志歲星贏而東北石氏見覺星甘氏不出三月迺

生天棊本類星末銳長四尺史記正義末銳長四丈
出東北方西方天下兵爭

進而東南三月生彗星長二丈類彗星

漢志歲星羸而東南石氏見彗星甘氏不出三月迺
生彗本類星末類彗長二丈史記正義天彗一名掃
星小者數寸長長或竟天體無光假日之光夕見東
指晨見西指見則兵起除舊布新所指之處弱

退而西北

孟康曰歲星當伏西方行遊早沒變為祿星

三月生天權長四丈未兌

漢志歲星縮而西北石氏見權雲如馬甘氏不出三月迺生天權本類星未銳長數丈京房云天權為真赤地千里枯骨籍籍

退而西南三月生天槍長數丈兩頭兌謹視其所見之國不可舉事用兵

漢志歲星縮而西南石氏見槍雲如牛甘氏不出三

月迺生天槍左右銳長數丈槍欖棊彗異狀其殃一也必有破國亂君伏死其辜

其出如浮如沉其國有土功如沉如浮其野亡色赤而有角其所居國昌迎角而戰者不勝星色赤黃而沉所居野大穰色青白而赤灰所居野有憂

自如浮如沉以下皆謂歲星

歲星八月其野有逐相與太白鬪其野有破軍歲星一曰攝提曰重華曰應星曰紀星營室為清廟歲星廟也察剛氣以處熒惑

晉灼云常以十月入太微受制而出行列宿司無道
出入無常

曰南方火主夏日丙丁禮失罰出熒惑熒惑失行是也
漢志南方夏火禮也視也禮虧視失逆夏令傷火氣
罰見熒惑

出則有兵入則兵散以其舍命國為勃亂殘賊疾喪饑
兵

天官占熒惑伺驕奢亂孽其精為風伯惑童兒歌謠

嬉戲

反道二舍以上居之三月有殃五月受兵七月半亡地
九月大半亡地因與俱出入國絕祀居之殃還至雖大
當小久而至當小反大其南為丈夫北為女子喪若角
動繞環之及乍前乍後左右殃益大與他星鬪光相逮
為害五星相從聚于一舍

正義三星合為驚位絕行其國外內有兵與喪民饑
改立侯王四星合為太陽其國兵喪暴起君子憂小

人流五星合為易行有德受慶掩有四方無德受殃
乃以滅亡

其下國可以禮致天下法出東行十六舍而止行二舍
六旬復東行自所止數十舍十月而入西方伏行五月
出東方其出西方曰反明主命者惡之東行急一日行
一度半其行東西南北疾也兵各聚其下用戰順之勝
逆之敗熒惑從太白軍憂離之軍却出太白陰有分軍
行其陽有偏將戰當其行太白速之破軍殺將其入守

犯太微軒轅營室主命惡之心為明堂熒惑廟也謹候此
厯斗之會以定填星之位

晉灼云常以甲辰之元始建斗歲鎮一宿二十八歲
而周天

曰中央土主季夏日戌巳黃帝主德女主象也歲填一宿
漢志中央季夏土信也思心也仁義禮智以信為主
貌言視聽以心為正故四星皆失填星迺為之動

其所居國吉未當居而居若已去而復還還居之其國

得土不乃得女若當居而不居既已居之又東西去其國失土不乃失女不可舉事用兵其居久其國福厚易福薄其一名曰地侯主歲歲行十二度百十二分度之五日行二十八分度之一二十八歲而周天其所居五星皆從而聚于一舍其下之國可重致天下禮德義殺刑盡失填星乃為之動搖羸為王不寧縮有軍不復填星色黃九芒音曰黃鐘宮其失次上二三宿曰羸有主命不成不乃大水失次下二三宿曰縮有后戚其歲不

復不乃天裂若地動斗為文太室填星廟天子之星也
木星與土合為內亂饑主勿用戰敗水則變謀而更事
火為旱金為白衣會若水金在南曰牝牡年穀熟金在
北歲偏無

索隱歲陽也太白陰也故曰牝牡

火與水合為焠與金合為鑠為喪皆不可舉事用兵大
敗土為憂生孽卿大饑戰敗為北軍軍困舉事大敗土
與水合穰而擁闕有覆軍不可舉事出亡地入得地金

為疾為內兵亡地三星若合其宿地國外內有兵與喪
改立公王四星合兵喪並起君子憂小人流五星合是
為易行有德受慶改立大人奄有四方子孫蕃昌無德
受殃若亡填星出百二十日而逆西行西行百二十日
反東行見三百三十日而入入三十日復出東方太歲
在甲寅填星在東壁故在營室

察日行以處位太白

晉灼曰常以正月甲寅與熒惑晨出東方二百四十

日而入又出西方二百四十日而入入三十五日而復出東方爾雅注晨出東方高三丈命曰啟明昏見西方高三舍命曰太白

曰西方秋司兵月行及天矢

正義太白五芒出早為月蝕晚為天矢及彗其精散為天杵天榘伏靈大敗司奸天狗賤星天殘卒起星是古厯星若竹彗牆星猿星白彗皆以示變

日庚辛主殺殺失者罰出太白

漢志西方秋金義也言也義虧言失逆秋令傷金氣
蜀見太白

太白失行以其舍命國其出行十八舍二百四十日而
入入東方伏行十一舍百三十日其入西方伏行三舍
十六日而出當出不出當入不入是謂失舍不有破軍
必有國軍之篡其紀上元

索隱上元是古歷之名

以攝提格之歲與營室晨出東方至角而入與營室夕

出西方至角而入與角晨出入畢與角夕出入畢與畢
晨出入箕與畢夕出入箕與箕晨出入柳與箕夕出入
柳與柳晨出入營室與柳夕出入營室凡出入東西各
五為八歲二百二十日復與營室晨出東方其大率歲
一周天其始出東方行遲率日半度一百二十日必逆
行一二舍上極而反東行行日一度半一百二十日入
其庫近日曰明星柔高遠日曰大囂剛其始出西行疾
率日一度半百二十日上極而行遲日半度百二十日

且入必逆行一二舍而入其庫近日曰太白柔高遠日
曰大相剛出以辰戌入以丑未當出不出未當入而入
天下偃兵兵在外入未當出而出當入而不入下起兵
有破國其當期出也其國昌其出東為東入東為北方
出西為西入西為南方所居久其鄉利疾其鄉凶出西
逆行至東正西國吉出東至西正東國吉其出不經天
經天下革政

孟康云太白陰星出東當伏東出西當伏西過午為

經天晉灼曰日陽也日出則星沒太白晝見午上為
經天

小以角動兵起始出大後小兵弱出小後大兵強出高
用兵深吉淺凶庠淺吉深凶日方南金居其南日方北
金居其北曰羸

康成云方猶向也謂晝漏半而置土圭影短于土圭
謂之日南地于日為近南也長于土圭謂之日北地
于日為近北也

侯王不寧用兵進吉退凶日方南金居其北日方北金居其南曰縮侯王有憂用兵退吉進凶用兵相太白太白行疾疾行行遲遲行角敢戰動搖躁躁國以靜靜順角所指吉反之凶出則出兵入則入兵赤角有戰白角有喪黑圓角憂有水事青圓小角憂有木事黃圓和角有土事有年其已出三日而復微入入三日乃復盛出是謂與其下國有軍敗將北其已入三日又復微出出三日而復盛入其下國有憂師有糧食兵革遺人用之

卒為人虜其出西失行外國敗出東失行中國敗其色
大圜黃渾可為好事其圜大赤兵盛不戰太白白比狼
赤比心黃比參左肩蒼比參右肩黑比奎大星五星皆
從太白而聚一舍其下之國可以兵從天下居實有得
居虛無得

索隱實謂星所合居之宿虛謂羸縮

行勝色色勝位有位勝無位有色勝無色行得盡勝之
晉灼云行應天度雖有色得位行盡勝之行重而色

位輕星經得作德

出而留桑榆間疾其下國上而疾未盡期日過參天疾
其對國上復下下復上有反將其八月將僂金木星合
光其下戰不合兵雖起而不鬪合相毀野有破軍出西
方昏而出陰陰兵彊暮食出小弱夜半出中弱雞鳴出
大弱是謂陰陷于陽其在東方乘明而出陽陽兵之彊
雞鳴出小弱夜半出中弱昏出大弱是謂陽陷于陰太
白伏也以出兵兵有殃其出卯南南勝北方出卯北北

勝南方正在卯東國利出酉北北勝南方出酉南南勝
北方正在酉西國勝其與列星相犯小戰五星大戰

漢志太白軍也熒惑憂也熒惑從太白軍憂離之軍舒
其相犯太白出其南南國敗出其北北國敗行疾武不
行文色白五芒出蚤為月蝕晚為天矢及彗星將發其
國出東為德舉事左之迎之吉出西為刑舉事右之背
之吉反之皆凶太白光見景戰勝晝見而經天是謂爭
明彊國弱小國彊女主昌亢為疏廟太白廟也太白大

臣也其號上公其他名殷星太正營星觀星宮星明星
大衰大澤終星大相天浩序星月緯大司馬位謹候此
察日辰之會以治辰星之位

晉灼云常以二月春分見奎婁五月夏至見東井八
月秋分見角亢十一月冬至見牽牛出以辰戌入以
丑未二旬而入晨候之東方夕候之西方宋均曰辰
星正四時之法與北辰同名廣雅辰星謂之兔星
曰北方水太陰之精主冬日壬癸刑失者罰出辰星

漢志北方冬水智也聽也智虧聽失逆冬令傷水氣
蜀見辰星

以其宿命國是正四時仲春春分夕出郊奎婁胃東五
舍為齊仲夏夏至夕出郊東井輿鬼柳東七舍為楚仲
秋秋分夕出郊角亢氐房東四舍為漢仲冬冬至晨出
郊東方與尾箕斗牽牛俱西為中國其出入常以辰戌
丑未其蚤為月蝕晚為彗星及天矢其時宜效不效為
失追兵在外不戰一時不出其時不和四時不出天下

大饑其當效而出也色白為旱黃為五穀熟赤為兵黑
為水出東方大而白有兵于外解在東其赤中國勝西
而赤外國利無兵于外而赤兵起其與太白俱出東方
皆赤而角外國大敗其與太白俱出西方皆赤而角外
國利五星分天之中積于東方中國利積于西方外國
用者利五星皆從辰星而聚于一舍其所舍之國可以
法致天下辰星不出太白為客其出太白為主出而與
太白不相從野雖有軍不戰出東方太白出西方若出

西方太白出東方為格野雖有兵不戰失其時而出為
當寒反溫當溫反寒當出不出是謂擊卒兵大起其入
太白中而上出破軍殺將客軍勝下出客亡地辰星來
抵太白太白不去將死正旗上出旗星名有九星破軍殺將客
勝下出客亡地視旗所指以命破軍其繞環太白若與
鬪大戰客勝免過太白間可械劍小戰客勝免居太白
前軍罷出太白左小戰摩太白右數萬人戰主人吏死
出太白右去三尺軍急約戰免七命曰小正辰星天攬

安周星細爽能星鉤星

索隱謂免星有七名命者名也

其色黃而小出

而易處天下之文變而不善矣青圜憂白圜喪赤圜中

不平黑圜吉青角兵憂黑角水赤行窮兵之所終

赤一作意

或作志

赤角犯我城黃角地之爭白角號泣之聲其出東

方行四舍四十八日其數二十日而反入于東方其出

西方行四舍四十八日其數二十日而反入于西方其

一候之營室角畢箕柳出房心間地動辰星之色春青

黃夏赤白秋青白而歲熟冬黃而不明即變其色其時

不昌春不見大風秋則不實夏不見六十日旱月蝕秋
不見有兵春則不生冬不見陰雨六十日有流邑夏則
不長七星為員官辰星廟蠻夷星也

天官書

五星皆大其事亦大皆小事亦小旱出者為羸羸者為
客晚出者為縮縮者為主人羸縮必有天應見于杓同
舍為合相凌為鬪七寸以內必之矣五星色白圜為喪
早赤圜中不平為兵青圜為憂水黑圜為疾多死黃圜
則吉赤角犯我城黃角地之爭白角哭泣之聲青角有

兵憂黑角則水意行窮兵之所終五星同色天下偃兵

百姓寧昌

天官書

凡五星歲緩則不行急則過分逆則占熒惑緩則不出
急則不入違道則占填緩則不逮急則過舍逆則占太
白緩則不出急則不入逆則占辰緩則不出急則不入
非時則占古歷五星之推亡逆行者至甘氏石氏經以
熒惑太白為有逆行夫歷者正行也古人有言曰天下
太平五星循度亡有逆行日不食朔月不食望夏氏曰

月傳曰日月食盡主位也不盡臣位也星傳曰日者德也月者刑也故曰日食修德月食修刑然而歷紀推月食與二星之逆亡異熒惑主內亂太白主兵月主刑自周衰亂臣賊子師旅數起刑罰失中雖其亡亂臣賊子師旅之變內臣猶不治四裔猶不服兵革猶不寢刑罰猶不錯故二星與月為之失度三變常見及有亂臣賊子伏尸流血之兵大變乃出甘石氏見其常然因以為紀皆非正行也詩云彼月而食則惟其常此日而食于

何不臧詩傳曰月食非常也比之日食猶常也日食則不臧矣謂之小變可也謂之正行非也故熒惑必行十六舍去日遠而顯恣太白出西方進在日前氣盛乃逆行及月必食于望亦誅盛也

漢志

二十八宿主十二州斗秉兼之

言北斗所建主十二辰兼十二州二十八宿

所從來久矣角亢氐兗州房心豫州尾箕幽州斗江湖牽牛婺女揚州虛危青州營室至東壁并州奎婁胃徐州昴畢冀州觜鶻參益州東井輿鬼雍州柳七星張三

河翼軫荆州

天官書

自斗十一度至婺女七度曰星紀之次于辰在丑謂之
赤奮若于律為黃鐘斗建在子吳越分野自婺女八度
至危十六度曰玄枵之次于辰在子謂之困敦于律為
大呂斗建在丑齊分野自危十七度至奎四度曰娵訾
之次于辰在亥謂之大淵獻于律為太簇斗建在寅衛
分野自奎五度至胃六度曰降婁之次于辰在戌謂之
闍茂于律為夾鐘斗建在卯魯分野自胃七度至畢十

一度曰大梁之次于辰在酉謂之作噩于律為姑洗斗
建在辰趙分野自畢十二度至東井十五度曰實沈之
次于辰在申謂之泥灘于律為中呂斗建在巳晉魏分
野自井十六度至柳八度曰鶉首之次于辰在未謂之
叶洽于律為蕤賓斗建在午秦分野自柳九度至張十
七度曰鶉火之次于辰在午謂之敦牂于律為林鐘斗
建在未周分野自張十八度至軫十一度曰鶉尾之次
于辰在巳謂之大荒落于律為夷則斗建在申楚分野

自軫十二度至氐四度曰壽星之次于辰在辰謂之執
徐于律為南吕斗建在酉韓分野自氐五度至尾九度
曰大火之次于辰在卯謂之單闕于律為無射斗建在
戌宋分野自尾十度至斗十度百三十五分而終曰析
木之次于辰在寅謂之攝提格于律為應鐘斗建在亥

燕分野

帝王
世紀

一曰秦之疆候太白占狼弧吳楚之疆候熒惑占烏衡
燕齊之疆候辰星占虛危宋鄭之疆候歲星占房心晉

之疆亦候辰星占參罰及秦并吞三晉燕代自河山以南者中國中國于四海內則在東南為陽陽則日歲星熒惑填星占于街南畢主之其西北則胡貉月氏旃裘引弓之民為陰陰則月太白辰星占于街北昴主之故中國山川東北流其維首在隴蜀尾沒于勃海碣石是以秦晉好用兵復占太白太白血主中國而胡貉數侵掠獨占辰星辰星出入燥疾常主夷狄其大經也甲乙海外日月不占丙丁江淮海岱戊己中州河濟庚辛華山以

西壬癸常山以北一曰甲齊乙東夷丙楚丁南夷戊魏
己韓庚秦辛西夷壬燕趙癸北夷子周丑翟寅趙卯鄭

辰邯鄲己衛午秦未中山申齊酉魯戌吳越亥燕代

漢志

春秋元命苞五星流為兗州鈎鈐星別為豫州箕星
散為幽州分為燕國牽牛流為揚州分為越國虛危
之精流為青州分為齊國營室流為并州分為衛國
天弓星流為徐州昴畢間為天街散為冀州分為趙
國背參流為益州東井鬼星散為雍州分為秦國軫

星散為荊州分為楚國洛書甄曜度蟠冢山上為狼
星武開山為地門上為天高星荆山為地雌上為軒
轅星大別山為地理以天合地以通三危山在鳥鼠
之西南上為天苑星坎山在崑崙東南為地乳上為
天糜星汶山之地為井絡帝以會昌神以建福上為
天井星桐柏山為地穴烏鼠同穴山之幹也上為掩
畢星熊耳山地門也精上為畢附耳星春秋文耀鉤
布度定記分州繫象華岐以西龍門積石至二危之

野雍州屬魁星大行以東至碣石王屋砥柱冀州屬
樞星三河雷澤東至海岱以北兗州屬機星蒙山以
東至南江會稽震澤徐揚之州屬權星大別以東至
雷澤九江荊州屬衡星荊山西南至岷山北嶽鳥鼠
梁州屬開星外方熊耳以至泗水陪尾豫州屬搖星
博雅同 二緯之說一以山鎮上為列星一以北斗
下屬九州奇詭獨異姑附識之以廣博聞

按周官保章氏以星土辨九州之地所封封域各有

分星以觀妖祥而春秋傳曰參為晉星商主大火國語亦有歲之所在則我有周之分野是分野之說所從來久矣康成則謂其書已亡所存非古數然則周官之所謂分星不知其何等也至以二十八宿分主九州則有疑焉夫恒星為天體而二十八宿天體盡矣中國九州于地特十之一耳以周天之星圉以一隅之地是隘視天廣視中國如此以定妖祥未必然也賈公彥疏云吳越在南齊魯在東歲星或北或西

不依國地所在者此古受封之日歲星所在之辰國屬焉故也此說似與周官為近說詳分野圖後

國皇星大而赤狀類南極所出其下起兵兵彊其衝不利

孟康曰歲星之精散所為也五星之精散為六十四變記不盡晉志去地三丈如炬火主內寇內難或曰
內外有兵喪

昭明星大而白無角乍上乍下所出國起兵多變

孟康曰形如三足杌杌上有九彗上向熒惑之精春
秋合誠圖赤帝之精象如太白七芒釋名為筆星氣
有一枝末銳似筆亦曰日華星晉志赤彗分為昭明
昭明滅光以為起霸起德之徵

五殘星出正東東方之野其星狀類辰星去地可六丈大
孟康云星表有青氣暈有毛填星之精晉志一名五
縫或曰蒼彗大而赤數動主乖亡為五分毀敗之徵
亦為備急兵見則主誅政在伯野亂成有急兵有喪

不利衝

賊星出正南南方之野星去地可六丈大而赤數動有光
孟康云形如彗九尺太白之精晉志六賊南方之星
五殘六賊出禍合天下逆侵闕樞其下有兵衝不利
司危星出正西西方之野星去地可六丈大而白類太白
孟康云星大而有毛兩角熒惑之精晉志數動察之
而赤為乖爭之徵主擊強兵見則主失法豪傑起天
子以不義失國有聲之臣行主德

獄漢星出正北方之野星去地可六丈大而赤數動
察之中青此四野星所出出非其方其下有兵衝不利
孟康云青中赤表下有二彗縱橫亦填星之精晉志
一名咸漢主逐王主刺王出則陰精橫兵起其下又
為喪動則諸侯驚

四填星所出四隅去地可四丈

晉志或曰星大而赤去地二丈常以夜半時出見十
月而兵起

地維咸光亦出四隅去地可三丈若月始出所見下有

亂亂者亡有德者昌

晉志作
滅光

燭星狀如太白其出也不行見則滅所燭者城邑亂

益康云星上有三彗上出填星之精晉志或曰主星
所出城邑亂有大道不成又以五色占

如星非星如雲非雲命曰歸邪歸邪出必有歸國者邪
音蛇

孟康云星有兩赤彗上向上有益狀如氣下連星

天狗狀如犬奔星有聲其下止地類狗所墮及炎火望
之如火光炎炎衝天其下圜如數頃田處上兌者則有
黃色千里破軍殺將

孟康云星有尾旁有短彗下有如狗形者太白之精
晉志主侯兵討賊或曰是將鬪人相食所往之鄉有
流血其君失地兵大起國易政

格澤星如炎火之狀黃白起地而上下大上兌其見也
不種而獲不有土功必有大害

格澤音鵲鐸晉
志以為瑞星

蚩尤之旗類彗而後曲象旗見則王者征伐四方

孟康云熒惑之精呂氏春秋其色黃上下白晉志或曰赤雲獨見或曰其色黃上白下或曰若植藿而長或曰如箕可長二丈未有星主伐柱逆主惑亂所見之方下有兵兵大起不然有喪

旬始出于北斗旁狀如雄雞其怒青黑象伏龍

怒當音帑晉灼曰帑雌也晉志主爭兵又黃彗分為旬始為立主之題主亂主招橫見則臣亂兵作諸侯

虐期十年聖人起伐羣猾橫恣或曰出則諸侯雄鳴
枉天類大流星蛇行而倉黑望之如有毛羽然

晉志主反萌主射愚見則謀反之兵合射所謀亦為
以亂伐亂

長庚如一匹布著天此星見兵起

天官書

彗星所謂掃星本類星末類彗小者數寸長或寬天見
則兵起大水主掃除舊布新有五色各依五行所主
彗體無光傳日而為光故夕見則東指晨見則西指

頓挫甚芒或長或短光芒所及則為災爾雅彗星為
欃槍奔星為彗約

孛星偏指曰彗芒氣四出曰孛孛者孛孛然惡氣之所
生也內不有大亂則外有大兵天下合謀闡蔽不明有
所傷害

晏子曰君若不改孛星將出彗星何懼由是言之災
甚于彗

天棓一名覺星本類星末兌長四丈或出東北方西方

主奮爭天槍其出不過三月必有破國亂君伏死其辜
殃之不盡當為旱饑暴疾

天欖石氏曰雲如牛狀甘氏曰本類星未見主捕制

天衝出如人蒼衣赤頭不動見則臣謀主武卒發天子

亡晉志

彗孛以下史記于五星內見之故不再錄今依晉志
增附之備妖星之全

天精而見景星景星者德星也其狀無常出于有道之國

晉志瑞星有四一曰景星如半月生于晦朔助月為
明或曰星大而中空或曰有三星在赤方氣與青方
氣相連黃星在赤方氣中二曰周伯星黃色煌煌然
所見之國大昌三曰含譽光耀似彗喜則含譽射四
曰格澤不種而獲有土功有大客 按周伯含譽二
星甘石星經及史記皆無之志成于李淳風蓋取荆
州雜占諸說以入之而甚不可者為含譽何也夫彗
者妖氣之所生天所以示變警人主也安有德星而

復以彗者乎象緯玄遠毫釐之差吉凶素焉誰得而證之將使驕愼之主藉口于上阿諛之臣肆奸于下逞而不懼遂而不悔必底于亡而後已不幾戾天之仁乎今削之

星者金之散氣本曰火

孟康云星名

星衆國吉少則凶漢者

亦金之散氣其本曰水

河圖括地象河精為天漢

漢星多多水少則旱其大經也星隊至地則石也河濟

之間時有隊星

天鼓有音如雷非雷音在地而下及地其所往者兵發

其下

天官書

歲星之精流為天棊天槍天猾天衝國皇及登蒼彗

熒惑散為昭旦蚩尤之旗昭明司危天欖赤彗

填星散為五殘獄漢大賁昭星絀流旬始蚩尤虹蜺擊

咎黃彗

太白散為天杵天柎伏靈大敗司姦天狗天殘卒起白彗

辰星散為枉矢破女拂樞滅實繞縱驚理大奮祀黑彗
五色之彗各有長短曲折應焉

河圖

京房集星章妖星皆見于月旁互有五色方雲以五
寅日見天槍天根天荆真若天猿天樓天垣歲星所生
見以甲寅其星有兩青方在其旁天陰晉若官張天
惑天崔赤若虫尤熒惑所生出在景寅有兩赤方在
其旁天上天伐從星天樞天翟天沸荆彗填星所生
出在戊寅有兩黃方在其旁若星帚星若彗竹彗檣

星椽星白藿太白所生出在庚寅有兩白方在其旁
天美天冕天社天麻天林天蒿端下辰星所生出以
壬寅有兩黑方在其旁三十五星五行氣所生皆出
于月左右方氣之中各以其所生星將出不出日數
期候之當其未出之前而見見則有水旱兵喪饑亂
所指亡國失地主死破軍殺將

凡望雲氣仰而望之三四百里平望在桑榆上餘二千
里登高而望之下屬地者三千里雲氣有獸居上者勝

自華以南氣下黑上赤嵩高三河之交氣正赤恒山之
北氣下黑上青勃碣海岱之間氣皆黑江淮之間氣皆
白徒氣白土功氣黃車氣乍高乍下往往而聚騎氣卑
而布卒氣搏前卑而後高者疾前方而高後兌而卑者
却其氣平者其行徐前高而後卑者不止而反氣相遇
者卑勝高兌勝方氣來卑而循車轍者不過三四日去
之五六里見氣來高七八尺者不過五六日去之十餘
里見氣來高丈餘二丈者不過三四十日去之五六十

里見稍雲精白者其將悍其士怯其大根而前絕遠者
當戰青白其前抵者戰勝其前赤而仰者戰不勝陣雲
如立垣杼雲類杼軸雲搏兩端兌杓雲如繩者居前巨
天其半半天其翬者類闕旗

翬亦作
蛻音同

故鉤雲句曲諸此

雲見以五色合占而澤搏密其見動人乃有占兵必起
合闕其直正朔所候決于日旁日旁雲氣人主象皆如
其形以占故北夷之氣如羣畜穹閭南夷之氣類舟舩
幡旗大水處敗軍場破國之虛下有積錢金寶之上皆

有氣不可不察海旁蜃氣象樓臺廣野氣成宮闕然雲
氣各象其山川人民所積聚故候息耗者入國邑視封
疆田疇之正治城郭室屋門戶之潤澤次至車服畜產
精華實息者吉虛耗者凶若烟非烟若雲非雲郁郁紛
紛蕭索綸囿是謂卿雲卿雲見喜氣也若霧非霧衣冠
而不濡見則其域被甲而趨天雷電蝦虹辟厯夜明者
陽氣之動者也春夏則發秋冬則藏故候者無不司之
天開縣物地動坼絕山崩及徙川塞谿壅水澹澤竭地

長見象城郭門閭閨臬枯槁宮廟邸第人民所次謠俗
車服觀民飲食五穀草木觀其所屬倉府廡庫四通之
路六畜禽獸所產去就魚鼈鳥鼠觀其所處鬼哭皆呼

其人逢倍

倍迎也謂相逢而驚也

化言誠然

天官書

南風謂之凱風東風謂之谷風北風謂之涼風西風謂
之泰風焚輪謂之頽扶搖謂之姦風與火為庀迴風為
飄日出而風為暴風而雨土為霾陰而風為暄

風泥也其氣博

泥而動物也

天氣下地不應曰雩地氣發天不應曰霧霧謂

之晦

陰亂則為霧也

蝻蝻謂之雩蝻蝻虹也

蝻為挈貳陰陽之

精虹攻也純陽攻陰氣也

弁日為蔽雲

即暈氣

疾雷為霆霓

陰陽相薄感而為雷

激而為霆雷于天地為長子以其首長萬物為出入也

二月出地百八十日雷出則萬物出入月入地百八十日雷入則萬物入

入則與利也雨霓為霄雪

雲者陰之蓄積甚也

暴雨謂之

凍小雨謂之霖霖久雨謂之淫淫謂之霖濟謂之霽太

平之時十日一雨凡歲三十六雨此時若之應也

爾雅

凡候歲美惡謹候歲始歲始或冬至日產氣始萌臘明日人衆卒歲一會飲食發陽氣故曰初歲正月旦王者

歲首立春日四時之卒始也四始者候之日臘明正月

旦決八風風從南方來大旱西南小旱西方有兵西北

戎菽為

戎菽胡豆
為成也

小雨趣兵北方為中歲東北為上歲

東方大水東南民有疾疫歲惡故八風各與其衝對課

多者為勝多勝少久勝亟疾勝徐旦至食為麥食至日

昳為稷昳至舖為黍舖至下舖為菽下舖至日入為麻

欲終日有雨有雲有風有日日當其時者深而多實無

雲有風日當其時淺而多實有雲風無日當其時深而

少實有日無雲不風當其時者稼有敗如食頃小敗熟
五斗米頃大敗則風復起有雲其稼復起各以其時用
雲色占種其所宜其雨雪若寒歲惡是日光明聽都邑

人民之聲聲宮則歲善吉商則有兵徵旱羽水角歲惡
或從正月旦比數雨率日食一升至七升而極月一日
雨民有

一升之食二日雨民有
二升之食如此至七日過之不占數至十二日日直其

月占水旱月一日雨
正月水為其環城千里內占則其為天下

候竟正月

月三十日周天歷二十
八宿然後可占天下

月所離列宿日風雲

占其國然必察太歲所在在金穰水毀木饑火旱此其大經也正月上甲風從東方宜蠶風從西方若旦黃雲

惡冬至短極縣土炭

先冬至三日縣土炭于衝兩端輕重適均冬至日陽氣至則炭重夏

至日陰氣至則土重

炭動鹿角解蘭根出泉出躍畧以知日至要

決畧景歲星所在五穀逢昌其對為衝歲乃有殃

言畧景歲

星行不失次則五穀昌盛行而失舍有所衝則歲乃有禍殃

自初生民以來世主厯日月星辰及至五家三代紹而

明之

五家黃帝高陽高辛堯舜三代夏殷周也

幽厲以往尚矣所見天變皆

國殊窟穴家占物怪以合時應其文圖籍祿祥不法是以孔子論六經紀異而說不書至天道命不傳傳其人
不待告告非其人雖言不著昔之傳天數者高辛之前
重黎于唐虞羲和有夏昆吾殷商巫咸周室史佚萇弘
于宋子韋鄭則裨竈在齊甘公楚唐昧趙尹臯魏石申
夫天運三十歲一小變百年中變五百載大變三大變
一紀三紀而大備此其大數也為國者必貴三五即三五家三
代上下各千歲然後天下之際續備甘石歷五星法唯

獨熒惑有反逆行逆行所守及他星逆行日月薄蝕皆

以為占日月薄蝕行南北有時此其大度也故紫宮中宮

房心東宮權衡南宮咸池西宮虛危北宮列宿部星此天之五官

坐位也為經不移徙大小有差闊狹有常水火金木填

星此五者天之五佐為經緯五星行南北為經東西為緯見伏有時

所過行贏縮有度日變修德月變省刑星變結和凡天

變過度乃占國君强大有德者昌弱小飾詐者亡太上

修德其次修政其次修救其次修禳正下無之夫常星

之變希見而三光之占亟用日月暈適

暈日旁氣適日之將食先黑氣

之有變

雲風此天之客氣其發見亦有大運然其與政事

俯仰最近天人之符此五者天之感動為天數者必通

三五終始古今深觀時變察其精粗則天官備矣

蒼帝行德天門為之開

王者行春令布德澤則上應靈威仰之帝而天門為之開天門

即左右角間

赤帝行德天牢為之空

王者行德以應火精之帝則天牢為之空夏陽

主舒散故人主當赦過宥罪也

黃帝行德天天為之起

黃帝中央含樞紐之帝季夏萬

物盛大當大赦含養羣品也

風從西北來必以庚辛一秋中五至大

赦三至小赦白帝行德以正月二十日二十一日月暈

圍常大赦載謂有太陽也一曰白帝行德昴畢為之圍

白帝西方白招拒之帝秋萬物咸成則暈圍昴畢三暮帝德乃成也圍三暮德乃成不三

暮及圍不合德不成二曰以辰圍不出其旬黑帝行德

天闕為之動黑帝北方叶光紀之帝冬萬物閉藏動為之開閉也天一星在五車南畢西北為天


門天行德天子更立年天謂北極言王者當天心則北辰有光耀北辰有光耀則天子

更立年也不德風雨破石三能三衡者天廷也衡太微三光之廷客


星出天廷有奇令天官書

附天文圖

道赤



北圖




天官書

尚史


四十五

赤道




南圖


渾天圖體南低北昂北極常見不隱南極常隱不見
 赤道畫二極之中故當二極天體漸狹當赤道天體
 正潤舊法合為一圖以平圓狀渾圓致赤道以南反
 潤不得星位之正故分二圖



分野圖

鄭註周官謂保章氏之書已亡堪輿入度非古數而史以列宿統九州漢志以五星侯列國晉以十二次各有厥分與春秋內外傳畧有發明然支離棼亂無所準的如豕韋為唐叔之封土而豕韋在亥為并州屬衛大火為唐叔之封星而大火在卯為豫州屬宋參實為晉星而參為益州屬魏何也星紀同主兵越越何以獨得歲大火實主宋鄭陳衛何






以同火又嫩營為并州屬衛夫衛受封于河內後徙楚邱餘境在東
 郡為冀兗部并無與也而下列安定天水隴西諸郡又屬涼州以實
 沈為益州屬魏而魏分晉地得河內河東數十縣益無與也以鶻首
 為雍州屬秦而下列雲中定襄雁門諸郡又屬并州見又何也且夫
 星以地名者其國未建部初安繫以人名者其人未生號且誰歸矣
 秦鄭氏以天之所覆者廣而華夏所占唯牛女下十二國然則天市

兩說何以再列傳說一星主宮中禱祠傳說者謂傳母喜之然則奚仲王良又將何解至若星降而為人人去而復為星如呂氏莽渺之說愈無徵矣或又謂分野舛信初無常主推之則周極大地約之則分繫一隅抑又一說也

閏餘圖

歲法三百
五十四日
三百四十
八分
歲餘法萬
二百二十
七分
日法九百
四十分
月法二萬
七千七百
五十九分




天體圓周三百六十五度四分度之一繞地左旋一
日一周而過一度日行一日亦繞地一周而不及天
一度積三百六十五日九百四十分日之二百三十
五而與天會是一歲日行之數也月一日不及天十
三度十九分度之七積二十九日九百四十分日之
四百九十七而與日會十二會得日三百五十四九
百四十分日之二百四十八是一歲月行之數也三
百六十者一歲之常數也故日與天會而多五日九


百四十分日之二百三十五者為氣盈月與日會而少五日九百四十分日之五百九十二者為朔虛合氣盈朔虛而閏生焉故一歲閏率則十日九百四十分日之八百二十七三歲一閏則三十二日九百四十分日之六百單一五歲再閏則五十四日九百四十分日之三百七十五十有九歲七閏則氣朔分齊是為一章也必以十九歲而無餘分者天數終于九地數終于十九者天地一終之數積八十一章則

盈虛之餘盡而復始四時定而歲功成矣

日中道圖



南北極相去一百八十二度半彊赤道去南北極各九十一度彊春分日行正交赤道從此漸北距赤道二十四度是為夏至夏至以後日漸南至秋分還與赤道交從此漸南距赤道二十四度是為冬至其日行之道謂之黃道又有月行之道與日道相近交路而過半在日之表半在日之裏其當交則兩道相分去則相遠遠處相距六度此謂日有中道月有九行也



月行所交以黃道內為陰歷外為陽歷冬入陰歷夏

入陽歷月行青道

冬至夏至後青道半交在春分之宿當黃道東立冬立夏後青道半

交在立秋之宿當黃道東南至所衝之宿亦如之

冬入陽歷夏入陰歷月行

白道

冬至夏至後白道半交在秋分之宿當黃道西立冬立夏後白道半交在立秋之宿當黃道西

北至所衝之宿亦如之

春入陽歷秋入陰歷月行朱道

春分秋分後朱

道半交在夏至之宿當黃道南立春立秋後朱道半交在立夏之宿當黃道西南至所衝之宿亦如之

春入陰歷秋入陽歷月行黑道

春分秋分後黑道半交在冬至之宿當黃

道北立春立秋後黑道半交在立冬之宿當黃道東北至所衝之宿亦如之

四序離為八

節至陰陽之所交皆與黃道相會故月行有九道所謂日月之行有冬有夏也

圜規有九重疊相錯


黑道二出黃道北青道二出黃道東朱道二出黃道南白道二

出黃道西併黃道為九道

此先儒所傳九道舊圖也按月道雖重

如絲纏彈丸止一縷往來未嘗斷絕若如九規則道各有輪輪各有心斷而不屬是月之入各道也必於所交之處斜曲而後行理有不可矣元人知其非一之曰白道圖見後

月白道圖




大正四年

尚史

五十五

月道斜交黃道交初入黃道北至交半緯度極大乃
向黃道行至交中出黃道南極于交半緯度又最大
又向黃道行至交初而一周每周退天之度為交差
每一交之差退天一度餘凡二百四十九交有奇退
天一周終而復始

月晦朔弦望圖




天官地官

尚文

五十六

天有十二次日每月行一次月每月行周天復過一
次故日月之會月移一次也如正月會于析木二月
日行過大火月一周天復行至大火故二月會于大
火也月本無光日耀之以為光光之初生如鉤日在
其西去日漸遠光漸增八日為上弦十五日日月相
對為望望後去日漸近光漸減二十三日為下弦光
之將盡日在其東遂會而為晦也

九天圖



屈子曰圜有九重孰營度之是古之言天有九重之說而自漢以下失之也蓋恒星七政并宗動為九宗動者無星之天一氣旋運而為衆動之宗者也

所以知有

此天者此天樞紐繫于太虛萬古不移而恒星天之極星去樞紐之不動者較古漸遠二十八舍經緯因之亦有古今之異是恒星自為一天在此天之下與七政同也地居天中與天度相

應七政運行于天之内去地遠近不同最近地者月次日金水次火次木次土最遠恒星以行之遲疾校之月疾日金水遲火又遲木又遲土最遲知近則疾

遠則遲也以象之高下測之火退望時體大光燦金
水退伏則遂出日下月長掩日是亦以次而近之徵
也以理之陰陽推之火木土陽也在日之外金水月
陰也在日之內有男女正位之義焉又其章著者也

朱子云騷注九天只是九重蓋天運行有許多重數
在內者較緩至第九重則轉得愈緊矣地在中央不
動不足在下天包乎地其氣極急形氣相催緊
束而成體但中間之氣稍寬所以容得品物 天有

九重故七政各有本天然惟恒星以地心為心七政
之天則不以地心為心因其有小大遲疾知有高卑

也在最高則遠地視徑小覺行遲其差為胸在最卑
則近地視徑大覺行速其差為眇

ス
ノ
ノ
ノ
ノ
ノ



尚
也

五
十九

五星周天圖




凡五星東行為順西行為逆趨舍而前為盈退舍而後為縮近日則伏遠日則見同舍曰合同宿曰聚木星近日則遲遠日則疾火星近日則疾遠日則遲土星平行無太遲疾金星附日而行此舊說也

按七政各有本天有本輪日無次輪本輪上行度即為日體月及五星本輪之周又有次輪本輪上行度尚非月五星之體而次輪所行也本輪行度日金水歲一周月一歲十三周有奇火約二歲木約十二歲


土約二十八歲皆一周星行次輪土三百七十八日
奇而一周木三百九十九日弱而一周火七百八十
日弱而一周金五百八十四日弱而一周水一百一
十六日弱而一周皆自合伏至合伏也惟月則十四
日奇而一周朔至望望至朔皆得全周也

五星遲疾留退圖



土木火合伏起順疾日前星後而晨見漸遠漸遲遲極而留將望而朔既望夕見逆極而留乃順運行近日復疾再與日合而一周金水合伏亦起順疾日後星前而夕見漸遠漸遲遲極而留逆行就日而伏既乃晨見逆而極速復留漸順運行近日復疾再與日合而一周漢歷有遲速留逆諸限以今求之則星在次輪終古平行無有遲速其有遲速而又有逆留者皆視行也蓋星行上半輪在本天之外去地最遠與

輪心俱逐日而東輪行而星亦行故見為疾漸下在
兩旁盡處人自下望其勢徑直雖行而似不行然星
雖不動而輪猶移故見為遲及入下半輪稍深輪東
星西其數相除恰盡則見為留星之西行其數稍贏
則見為逆數適等又見為留轉至兩旁盡處又見為遲漸上
半輪界又以漸而速是故順逆遲留皆因人所見非星行實然而究
其故則輪周之轉為之也金水二星不經天者緣與日同天而其輪
心行度又與日等故退伏而不退望實則與三星同理也



九州地勢高下不同而兩極出入亦隨之增損幽冀
北極出地四十度揚州三十二度半青徐三十七度
并州三十八度雍州三十六度豫州三十五度荊州
三十六度梁州二十九度吳越三十度漢志所謂三
十六度者周漢皆都雍州專指秦雍而言不可以天
下槩也南極入地之度如北極出地之度

尚史卷九十四